



Te Whakapāha nā te Rōia Mātāmua o te Karauna ki ngā mōrehu o te tūkinō i te wā tiaki

Tēnā koutou katoa. Ko Una Jagose toku ingoa. Ko au Te Rōia Mātāmua o te Karauna mō Aotearoa, me te kaiwhakahaere mō te Tari Ture o te Karauna.

Me tīmata taku mihi ki a koutou katoa i pā kinotia, i a koutou e tiakina ana e te maru o te Karauna. Ka tūtohu au ki te mamae me te kohuki i pā ki a koutou, otirā i pā hoki ki ō koutou whānau. Ka tūtohu au ki te pānga tauroa o tēnei tū āhuetanga ki a koutou, ko ō whānau, me tō koutou oranga.

Hei Rōia Mātāmua, ka noho haepapa au ki te āhua o te kawenga mahi ture a te Karauna i rō Kōti. Kei konei au i tēnei ra ki te tuku whakapāha mō aua wā i whakawhēuauatia e ngā rōia ō koutou oranga.

Ko tāku i tēnei rā, he tuku i te aroha o te whakapāha.

Taku aroha kōrehu, i te kore o mātou ngā rōia i hāpai i te mana o ngā mōrehu o te tūkinō maru Karauna.

Taku aroha kōrehu, i te kore i aronui ki ngā mōrehu. Tērā ētahi wā, i taikaha raw ā mātou whakahaere.

Taku aroha kōrehu, i hē kē atu ai ngā āhuetanga mō koutou nā ā mātou mahi.

Ko te tikanga me whakahaere ngā mahi rōia mā te Kāwanatanga i runga i te whai whakaaro, otirā me mārama hoki ki te uaua mōu ki te whakaara ake, anō, i ngā kino me te whakahapa i pā ki a koe i roto i ngā tukanga ā-ture ōkawa.

He wā anō, i wareware mātou ki ō koutou āhua, te hunga kei te whakakanohi i ngā kerēme. Taku aroha kōrehu mō tērā.

He wā anō, i puta ētahi whakataunga kūare, tōkeke-kore, tikanga-kore hoki. He wā anō, nō mātou te hē i takaroa ai ngā tukanga ā-ture.

Kāore i tika tā mātou whakahaere i te kohinga o ētahi o ngā mōhiohio. Waihoki i ngā tau tōmua o te 1990, kāore mātou i tautohu i ētahi o ā koutou kerēme hei whakapae taihara nui. Taku aroha kōrehu i tēnei āhuetanga.

Kei te rongō au i tā koutou wero.

Nō muri mai kua whakarerekētia e mātou ētahi tikanga whakahaere ā-ture i ngā take tūkinō o mua. Ināianei kua rite ētahi tukanga motuhake hei whakatau i ngā take i waho kē o te kōti. Ko te hua o tēnei, ka paparehia ētahi o ngā tukanga whewheia o te kawē i tō kerēme ki te Kōti.

Ka mahi tahi mātou ngā rōia ki ētahi atu tāngata me te whakatau wawe i ō kerēme. Kua whakaritea e mātou ētahi tukanga hei aukati i te "matawā" o te Limitation Act, otirā kei aukatihia ngā kerēme nā ngā herenga o te wā; kua whakarerekētia e mātou tā mātou tikanga whakahaere i ngā tono whakamuna ingoa; otirā ka taea hoki te whakaea i ngā nama āwhina ā-ture ki roto i ngā whakataunga kerēme.

Me maumahara tonu ki te titiro ki te āhua o te tangata nōna te kerēme. Heoi, mō ngā wā kāore mātou i pērā, taku aroha kōrehu.

Ka haere tonu ā mātou mahi kimi tikanga ki te tūtohu ki te āhua o tō noho whakaraerae, me te tapu o ngā kōrero o ētahi kerēme, waihoki me te whakataurite i ā mātou mahi ki te tū hei māngai mō ngā Kāwanatanga, me te pupuri i te mana o te ture.

E kore au e tahuri kē. Ka tītike ake ā mātou whakahaere.

Tēnā koutou, tēnā koutou, tēnā koutou katoa.